

An Heilig Obed

Mr hääbe älls! Es fehlt aa nonz!
Dees Beschd sogar fiar Katz ond Hond! –
Was iiberleegschd? - Felit der's ett ei? -
Mo wedd'sch an Heilig Obed sei?

Uff ma Draumschiff en dr Siiedsee?
Liaber Gott, wia isch ao sellt schee!
Schwemma, Schlemma ond da Bauch en d'Sonna heeba.
Gell, dees wäar doch s'ällerschenschde Leeba!
Selle Leit ausnutza ond de Dregg nao liega lao,
Bladda butza ond an Graddl hao.

Oder dôô, - zom Trump en s' weiße Haus!
Ond feira mol en Sauß ond Braus.
Vornehm ässa, drengka, waas dr Ranza maa
Mit sell'ra schderricha Melanea.
Deiran Eidritt! S'geit nonz Geschenkts!
Halt Liaga, Oigalob ond Aoverschemmts.

Hosch uff Weihnächt ett môl Bock
Beim Putin zo Wodka ond Kasatschok?
Ehfrichdig doa ond d'Wôôhrat verheeba,
De ganz Zeit fürchda beim Essa om's Leeba!
Zom Nochdisch a bissle Gift en de Tee? -
Nô bisch garandiert am Weihnachtsdag hee.

Ond henna donn, beim schlaoa Dschie,
Dô geit's no lang koa Feschdmenie
fiar Freiheit, Liab ond Menschlichkeit! -
Veil Onderdriggung, Zwang ond Leid! –
Sei's dr Erdogan, dr Kim, dr Orban, liadrich,
Bei selle Kerle isch's ett gmiadlich!

Als Bua hao'ne mein Vadder blôôgd
Ond ean em Apfend ao amôl gfrôgt.
Ganz ernschd hott 'r gsaid: - „I glaob, - i moan, -
An Heilig Obed,- bisch'd am Beschda drhoam.”